

四庫全書

集部

欽定四庫全書

樂靜集卷九

宋 李昭玘 撰

問默

莊周曰道無問問無應然則即理而問則問不在言即物而應則應不自我此之謂無問無應而問默所以作也思玄先生僻居離羣不誦書不應賓客不呼奴隸不叱鷄狗坐如寐立如齋行如有所失而未得居三年門

無車庭無屨人皆怪而莫敢過有客升其堂扣其几而問曰先生何為者也先生支頤自若客下堂三呼而三招之先生嗒然不顧客將去為之歌曰明者塞而智者迷哀今之人兮似是而非先生矍然而起不待納履竭蹶而追之曰吾居三年口未嘗言而心之所潛意之所至畧自得於成心矣若夫逐者之聞聞聚者之譙譙故不能挫吾精而敗吾思今子反以為似是而非子猶有至道之精挈我而上趨邪將強聒迷繆而過詆我耶客

曰吾嘗相先生之形左耳目聰明而右耳目不達殆非  
陰陽不和而有偏傷之患先生幸以嘗覩聞者告我我  
因藥其傷而起之先生曰甚矣人之多言也言不若默  
默而識之是謂大得故天無言聖人欲無言一言以為  
彼二言以為此三言以并彼此道未嘗有彼此者亦未  
嘗無彼此也各操而議之果奚在夫言之一出至於三  
言而未能定則是非之相雜愛惡之相攻復幾千萬言  
而後已言之愈煩離道愈遠使天下之人沉偽而失真

撫華而去實者言之罪也噫言之為患已甚而又悲夫  
言者之自害也南方有羽蟲利喙而善鳴鳴亟益哀咀  
血而死北方有介蟲服氣而善息至潛而不躁其壽千  
歲今夫曉曉之口馳心氣而擢精神撓靜淵而洩和理  
反以害其生則吾之默默者豈特畏罪哉亦謹養吾生  
而已容曰先生可謂能默者也夫以言為無累邪言多  
則數窮以言為有累邪言雖滿天下而吾道寧喪天地  
之於萬物也雷震風鼓雨流川激百獸以羣嗥昆蟲以

類鳴有形之相磨有氣之相觸未嘗息也然則太空寥  
然至虛漠然又何累焉故有道者無所言無所不言終  
日言而非言終日不言而亦言其於言默也奚擇浮屠  
氏號為居士者問其徒以不二法其徒解析連類操三  
十二說以獻警然不答而三十二心皆化不害為能言  
蒙人學老聃者著書數萬言謬悠之說無端涯之辭連  
牀而無傷恣縱而不僮稽之無度逐之無宿不害為能  
默能言而不能默能默而不能言是乃據道之一偏而

非夫泊然大通者也射者之惡蚊蚋則志靜奕者之思  
鴻鵠則志動以靜對動則靜者勝然域於靜則失也古  
莽之民善眠故多息阜落之民常覺故多勞以息代勞  
則息者勝然拘於息則非也今先生能默而不能言猶  
拘於所域而蔽於所拘是以有偏傷之患而不足於冲  
和之氣以吾觀先生之不言殆惡夫與物爭而先生之  
志猶未出乎爭也有人曰龜長於蛇白狗黑犬可以為  
羊雞三足此形色名數之非其實者也苟知天下之物

不出於形色名數之異則天地之間同一物耳不足辯也故橫心之所念橫口之所言亦不知彼之是非利害歟亦不知此之是非利害歟如此則七竅流通百體俱融尚何鉗吻結舌閉心一氣譬猶食未下喉噎不得吐如此復自快耶至人之出言也與物去來隨起隨滅如鳥度空如風過物可見而不可逐可覺而不可執方且趯趯然從其後而掇之不亦惑歟先生曰子之說然矣是言猶默也默猶言也敢問非語默之時孰辨曰吾智



淺意迫不能知請詢之黃帝孔丘先生曰黃帝孔丘今亡矣將焉問客趨出先生領之而不謝

書鄧先生石凡

先生避地者也不以世故累其心人亦未嘗以所徇而干先生之好低回隱遠以自完潔不願聞乎時時亦不知先生果何人也城隍之東北其地阜以高先生即而築居焉葭蔣蕉蓼之披折鶩鵠鳬鶩之上下乃數十年之廢墟先生不以荒污窮僻不可居也覆茅為廬四面

環堵鑿戶如竇僂僂而出入不闕不鑰無食器無卧榻  
席地而坐隱几而觀書草深苔滑蟲鳴螽躍斷人足音  
人不堪其陋先生幸是以邀其身未嘗厭也一日先生  
出有盜過其廬弃書揭几而去先生曰吾不遊井里不  
受聲利是非之束縛榮辱之陷溺富貴之侵忍權門之  
凌咄吾逃之久矣而盜不容尚何邀吾之窮也夫盜之  
取吾几或售而食或析而炊吾不知然盜生於所利利  
生於所用埋黃金於地下不若瓦棺之能久無取於利

故也吾今琢石為几堅厚重大絕臂不能移以利則甚賤以為用則大迂吾庶幾保焉以是語天遊子天遊子應之曰先生以昔之有所利而不可保過為堅厚重大使不能移先生慮則勝矣先生之跡未免為誨盜也天下之物適來適去行流散徙不可捉而有也故達道者賓之而不主得之勿喜喪之勿悲先生不能隨物去米方且強梁去智而與物爭吾恐先生不能遯而猶區區為盜者守也壑舟之藏其下千仞勇者或負而趨之則

物有所不能固北山之險其上九折愚者必墜而平之則力有所不能屈今先生固我有以屈人之力吾是以知先生未免為誨盜也先生姑無其几無意其存亡適為几之義以達之於性命之際庶幾有所有而萬無喪也几之為器憑之以安石之為物置而不動先生憑而安之且不動也由是外觀萬物之芸芸內觀一性之明妙則知天地賊我陰陽奪我亦不甚毒耶先生冥是心以超乎天地陰陽之外虛而遨遊雖萬變迭陳乎前而

湛然常寂是几也流落乎千載之遠或為柱下礎或為  
塚上碣霆震風折水泐火裂塊而礫齏而塵會歸磨滅  
亦不足以喪先生之所存又果可為先生物哉

跋閣本法帖

太宗皇帝治定餘暇遊意翰墨嘗遣使購古帝王名卿  
墨帖集為十卷詔鏤板藏禁中每大臣登二府即賜焉  
歲久浸不復賜元豐中嘉王嘗從神考借其板模拂幾  
百本王府官盡得之士大夫間亦嘗見一二初長沙僧

希白再郭填刻石河東潘氏御史劉次莊又作別本識  
者謂希白善書不甚失真潘復易次間以他書御史所  
模尤疎濶夫獨前者縱學步者拘因人之迹而又加意  
焉則目亂而心疑神已虧矣故終不近也天下之物亦  
有以偽冒真者亦不能與真並行蓋有公是存焉自此  
尤以閣本為貴

跋三代款識

篆隸出而正書作正書作而行草興非獨古異以為奇

亦所變之勢然也字畫之工初盛於魏晉魏晉之間江  
左惟逸少尤著世數遼絕散落腐壞之餘出於物數之  
幸存日力之必能保者時一見於好事之家良可貴也  
昔韓退之作石鼓詩以為俗書失之姿媚亦至論也紆  
餘鮮妍粲然動人無復高古之遺態此姿媚之過也余  
故以三代款識為諸帖之冠嗚呼冠劍丈人朱鉛女子  
難以並觀孤裘純儉或作約又作白繡衣粲錯不可同筭而進  
識者自有別矣士固有陋古而排獨好者亦未易曉也

一作士之學道不能自信陋古而變其所習以排其衆人之好君子不道也

### 跋東坡真蹟

昔東坡守彭門嘗語舒堯文曰作字之法識淺見狹學不足三者終不能盡妙我則心目手俱得之矣觀其用筆凌厲馳逐出入二王之畛域而不見其轍迹晚年獨與顏魯公周旋並驅而步不許退也長牋大幅風吹雨洒如掃敗壁十目注視排肩爭取神氣不動兀如無人譬諸解衣磅礴未嘗見舟而操之莫知為我莫知為人



非神定氣閒孰能為之必曰三折為波隱鋒為點正如  
團土作人刻木似鵠復何神明之有

跋郭填諸帖

余嘗讀張彥遠法書要錄載二王書猶有四百六十餘  
帖以今所存考之十無二三此模書不可廢也陶隱居  
曰郭填蕭益曰響榻人空郭存聲散而響未闕故蹤餘  
韻歷歷可據慰人多矣璽楮弱薄一出囊笈則沒身朽  
壤初因傳模後來者得窺其髣髴與夫為去臣鑄金與

亡國繼絕盖有不忍之心存焉智巧之徒點漬穿缺綴以印章年次欺衆人之耳目不知而受者徒為人發笑知而受之又挾其欺以迷世榜牙冠玉襲以文錦冒好古之名掠人之好已復何心哉

跋孟仲寧畫蓮社圖

舒城李伯時作蓮社圖士大夫傳以為佳玩謂可與輞川並馳潁川晁无咎復得遺意頗加損益集古名筆以緡工孟仲寧為之曰可曰否如左如右獵奇擷妙變化

隨出雖摩詰復生恐不能過也夫意之所詣為難了人  
之意亦非易伶人吹管假工捻竅直肆橫出抗厲厭抑  
終不如律使其心運指應皆與神會則無不諧矣古之  
任事者嘗患不得其人為用用或非其人故余於此畫  
特有取焉耳

跋石曼卿詩後

右石曼卿詩三篇為侍御史高公作也高公初自御史  
以言事忤丁晉公出守淄川天聖三年擢戶部判官坐

試進士擅不如格左遷監兗州酒三年復官知單州時  
曼卿為濟州金鄉宰馳此詩寄之高公志大氣剛學貫  
今古論天下事有理勇于自任雖屢謫逐志愈不屈文  
章雅重有法度作詩務高古語健而志深一時望人也  
曼卿以豪偉自許獨深知其為人執弟子禮敬事之其  
詩引賈誼韓愈杜甫以見不得其志才不下古人區區  
冀復用以發于事業以此觀之士君子氣節相與又不  
可苟合必欲致身於功名之會惟恐汨汨以死非特言

辭取悅而已未幾高公再入為鹽鐵判官屬大河決澶  
淵乃疏利害議者不喜罷去知陝府卒于官後十年曼  
卿自海州通判遷祕閣校理上書陳西夏十事不報既  
而元昊犯吾圉邊邑騷動天子稍思其言方試一事不  
幸病且死嗚呼高公終身力行而三躋曼卿纔一進武  
而遂殞厥身竊讀此詩良可歎云大觀戊子仲秋朔樂  
靜堂題

書六逸四暢畫本

世傳四暢六逸畫本人物清肆不類世俗多以此愛之  
六逸者或以謂嵇康劉伶阮籍之徒四暢則不知奚人  
也觀其氣度超洒以琴書相遊翫然有傲世意其亦晉  
人之流乎噍者引仰鶴飲而橋額爬者跼蹐鷗蹲而捉  
膝拊背者據杖而伸足剔耳者目駐而心凝壅闕既攻  
竅戶流通瘡癢既祛肌絡皆充如噎得吐如跛得走如  
川決防如馬脫羈猶未足方其快此四者之暢也既醉  
而歸日暮牛飢鞭之不隨偃蹇將墜扶者不支欲跨而

竚頽然無所據奔驢駭御童子挽繯却顧後者擁之而  
不去二人者醉也斟酌俱適中褊不適彼罇既空欲辭  
莫得二人者將醉也吹竹為歌以相侑酬舉手抑耳請  
竢曲終二人者飲方和也解衿擢帶脫履隨帽禮法所  
不能禁君上所不能使以天為掌以地為塊以日月為  
跳丸以生為衣中虱以死為南面樂寒暑晝夜罔有知  
覺深觥大斗日以濡口飛鳥不瞬疾雷不驚昏昏冥冥  
我將何營雖祿以天下爵以人主無以易其樂此六者

之逸也吾不知四者之謂暢果固然邪果適然邪有役人焉日夜馳負勞形怵心輟足胝手食不充口卧不并睫一旦休其作程藉以筦簞飫以粱肉百體既舒屈伸自足其心愉愉莫知所得吾恐彼以為暢者正類是也吾不知六者之謂逸果無徇邪猶有徇邪有狂者焉惡聞人聲不願見色蔽目厭耳遠去塗巷謂人曰豕謂居室曰牢筴謂身曰囚謂衣冠曰五木散髮徒跣曠野而走吾恐彼所謂逸者正類是也夫未能忘形奚所謂暢



未能忘心奚所謂逸形忘者無時而不暢心忘者無事而不逸是道也語不能傳意不能至惟天樂而神遊者知之尚何感通塞於形骸排夢覺於桮杓哉彼數人者居相從坐相觀視天下之所得無以易我者固不知出醞甕而有大地舍斗水而有無津涯之江湖方且冥冥而飛相煦以濕亦可悲矣夫可悲者既甚愚悲人者亦未為智吾又安知不有悲吾之悲而不自悲者哉噫民之迷也固已久矣

戲答閻子常悲墨

寂寞先生畜陳唯進墨久矣一旦李子挹之而去先生  
悲墨之不還也作詩以追之李子有辭代墨以對曰魯  
人陳玄敬告先生先生保我幾三十年蒙埃如煙零丁  
壁間萬金之璧猶不易焉上書公車移文北闕俯仰前  
却會無一言愛而弗用莫如弃捐遇我何疎鄙我何厚  
玄圭不完漆身日瘦縱飲一升何補藜糗歸乎歸乎不  
若為李子之壽

書筆工王玠

東州筆工視他處為最勝前輩如睢陽元道寧曹南屈士安金鄉韓振營丘梁道皆為士大夫所稱近時彭門出一彭嵩與數人相先後今已亡矣惟鉅野秦穎丘自然工雖不同各有妙處比又得單父王玠製作精密已與時流並馳而獨駸駸未已也唐人多善書疑其用筆亦各自擇如顏魯公之端重柳河東之峭整歐陽率更之道勁虞永興緩而不弱褚河南清而麗李北海楷法好

為卧筆沉江西行書正出懸腕隨意作勢自成一家故  
善造筆者唯務識人意乃能盡妙

樂靜集卷九

欽定四庫全書

樂靜集卷十

宋 李昭玘 撰

上眉陽先生

月日謹齋潔裁書馳獻于眉陽先生閣下某記為童時  
先生父子兄弟一旦出岷峩四方士大夫稱誦其文曰  
有宋已來未嘗見此文也至採拾先生父子兄弟所著  
書人人為長編大軸手自操札較其所得多少以相輕

重某是時嘗得其本於親家雖未能深達義趣讀之反覆不知所以不能廢後數年偶友人晁補之自新城侍親歸云辱在先生門下雖疾風苦雨晨起夜半有所請質必待見先生而後去先生亦與之優游講析不記寢食必意盡而後止晁君氣豪邁辨博俊敏下筆輒數千言紆餘卓犖馳肆掣歛各盡其妙嘗曰此文蘇公謂某如此作此文某所作蘇公以為然者也又數年先生罷東武還朝晁君見先生於京師既歸昏夜扣門開軒置

燭出先生新文十餘篇促席吟誦晁君健辭氣每道先生言語至險絕處口吃如不快意須臾風雨暴落窻撼燭滅倏忽之間疑有神物二人者獨把卷囁嚅恍然不知心形之俱忘也某與晁君少同學而齒差長自知議論智識遠不及而彼獨聞道於賢先生頽顏熱中憤悱交作不幸頻年已來憂患摧鑠身窮而志感坐則面牆舉頭則碍屋慨然思遊四方趨走於賢士大夫之門少起其哀情湫底之氣然而賤迹凶纍觸事乖闕猶區區



收拾古人腐餘綴為文詞出應有司而輒玷一第得官  
於徐徐先生舊治也風迹未遠門生故吏多出庠序而  
半在官府每相過者論先生德義誦先生文章堂上琅  
琅終日不絕某獲代者舒堯文也堯文辱先生深知把  
酒揮墨登臨嘯歌無日不相尋言先生與人交畧去圭  
角洞見肺腑恐其不親己人亦自忘其鄙吝而不知所  
以化一日登黃樓曰此蘇公燕集之地也酒後喜為文  
章盡篋中無留紙如方盤大斛瀉出珠貝照爛磊落鏘

手奪目衆人排擠爭先取之惟恐其攫之不多也是時  
晚風落日遠山逶迤川流無波白鳥上下竊思昔年席  
上之樂徘徊俯仰欲去不能蓋中心眷焉者不獨在夫  
山水一時之覽也某與堯文仕宦同而堯文辱先生之  
遊最久物我未忘每自慚恨未幾王子中秀才以書見  
投出新文五篇愛其器質深重擺去俗習不類科舉文  
字乃知先生弟子由壻也某竊不自度扣以先生動止  
則曰蘇公在齊安掩闕著書俯仰一室淡然自足如巖

居隱士之行與世相遺少無謫官意嗚呼事不難無以知君子歲寒然後知松栢之後凋古之聖賢安居無事修身誠心者必期至於此而後信今斯人也某何得預聞焉故某昔之所謂憤悱慚恨者皆不留於心而惟知感動慨歎夜不卧寐自謂終身所修何為而及此也某蹤跡之賤未嘗聞於執事之前而出處違忤不得一拜道德之貌所韋傳先生之詳者皆出於先生交從親舊之間而得之尤多然而問魯人以泰山其言如是而高

如是而大已載於目前矣至於雲煙蔽虧氣象晦日  
麗雨潔春濃秋瘳變化無窮雖魯人有不能道者要須  
屏心注目躊躇終年而後能盡也天聰不遠人意相望  
朝廷一旦以詔起先生而位在公相不肖方謀為祿仕  
南北未定不知何時得造門下區區所懷輒爾陳叙窮  
冬苦寒惟乞為道自重不宣

上蘇黃門

月日具位某謹齋心服形裁書寄獻於筠州宣德先生

閣下某成童時已聞先生文章道德光耀震發驚撼天下耳目于今二十年公卿大夫閭巷之士講服傳道者嘗竊聞之矣自以賢不肖尊賤勢不相及復至出處乖隔無緣趨伏門下譬猶景星一出高者先見三尺之童行於稠人廣市之中欲引頸而望光彩未可得也守官東徐數月先生之壻王子中惠然肯顧不以不肖無可與語寓學舍幾一年數道先生議論風趣頗熟於耳前者稍獲銘誦日夜感躍如窮乏久饑之人乍食粱肉縱

未得大嚼聊使染指擔鼻亦足自慰幸甚幸甚後於王  
子中處得先生筠州東軒記讀之其意欲歸伏田里追  
求顏氏之樂又於高郵先生處得棲賢法堂記讀之以  
謂士苟一日聞道則死無餘事未幾黃州先生以書見  
復云舍弟子由學道三十年今粗始聞道考其言行信  
與昔有間矣某獲是三說敬拜避席歛容以思雖未能  
造先生之門上其堂而窺其室正猶牧羊之子方散亂  
失筭於多岐之間行大道者忽出手而一招之也嗚呼

士之困於俗習易已逐物類靡不反失其本心而不知  
學道之可樂者久矣非高明君子篤好而特立以振擢  
其昏憊欲死之質則聖人之門何賴焉此天下想望先  
生風采者非獨某一人也薄祿所縻未能脫然以去屈  
膝請教於下風而願為洒掃之列不勝慙恨伏乞為道  
自重下慰士望不宣再拜

上孫莘老

月日具位某謹百拜獻書于留守先生几下某應舉時

金陵荊公初在政府四方士大夫望風而來者戶外滿  
屨堂上滿席得荊公一言則公卿為之改容得二言則  
天子置之高位當時士大夫待荊公而進退不知幾何  
人也後荊公之罷政平日為之倒屣跣足者稍稍去而  
從他門毀短排陷訛訛百出雖市道不若也由此觀之  
前日之來逕為勢利爾今天下與語荊公道德同器識  
均趣舍之迹獨不負於終始之義特先生一人爾此天  
下有知之士歸先生宜如何矣某天與遭遇幸先生來



守徐憫其可教不忍弃之汙賤樂與之進三沐而三薰  
之日夜感勵不知所使而心中區區有欲傾寫於左右  
拘以屬吏不能豁然自道者久矣某生質卑近所見多  
昧性復緩濶不急於事每聞時人議論謂貧賤可恥富  
貴可致如夢睡中聽人語天上事耳雖略省心獨不知  
其可到也見一二輩纔入仕宦選得美官柔聲怡色惟  
恐不當人意如觀木偶人戲伸眉俛首舉動不自持但  
竊笑其機索使然爾某家本儒素先人在仕三十年纔

有田數頃子弟閉關讀書未嘗苦生事先人弃養既終  
喪私故敦逼弟兄奔走四方汲汲于祿仕不肖守官於  
此獨無他責俯仰一室黃卷中日與聖賢對為吏之樂  
莫甚此職但人生多事薄宦去來止如逆旅爾恐未能  
盡如今日之優游也自少強聒笑人親俗事喜就書史  
雖不能多記誦古人趣向粗覽大槩平生藝習書射音  
奕略無所好一讀古文輒終日不厭遇事感激聊復自  
賦雖組織非工要隨意遣適此二者縱使窮老愁餓決

知其不能廢若夫形骸之外非志所願而力不足者久已忘之矣仲尼曰四十五十而無聞焉斯亦不足畏也已自惟齒壯子長去四十之年如數朝暮修身行己治性養心之效曾未及古人之一二而忽忽將老此寤寐憂懼深自痛恨者也不幸事先生纔數月僅熟于聲貌而先生移鎮留府官責所拘不獲追隨杖几豈復天使之終愚乎伏承使旌戒道有日謹齋心服形三日不外視敬拜坐末願終餘教使今日之遭遇獨有異於碌碌

者他日不辱門下之遊沒齒知幸不宣某再拜

上孫莘老求先人埋銘

具位某今日謹齋潔裁書西鄉再拜獻于祕監學士  
先生閣下某嘗謂天下之情有欲於中者不能無求於  
外其求之也或樂而與之或拒而不應蓋求之則一而  
所求之者二也以利求人者憂於世俗之所必爭宜拒  
而不應也以義求人者合於君子之公好宜樂而與之  
也某今日之求正為義爾此所以內省而無疑直往而

不懼特有望於左右爾先君在仕四十年信道守義端  
重靜肅不作苟見不治苟得不趨俗不干譽世之所謂  
貧富貴賤寵辱利害者未嘗撓拂其心進退去就之際  
漠如也故見利則知畏未哀而早休安其志而已挾此  
之志以遊乎世其為人深知之也固寡矣雖然在先君  
言之志不願知於人則可在人子之心不能明先君之  
志以貽子孫以聞後世則罪也使有勢位者明之耶則  
不敢累其心使善辭說者明之邪則不敢誣其實必求

諸有道嚴正君子而已恭惟祕監學士先生道足以信  
萬世行足以服天下取捨以公議論不妄後生學士潔  
己以矜仰王公大人悚心而畏屈非獨不肖所受教也  
今得先生一言以銘先人壙中使其志足以貽子孫聞  
後世不泯泯於寂寥茫昧之中則人子之情沒齒不忘  
伏祈先生優恤之幸甚幸甚自惟不肖嚴事先生視之  
以父也先生所以教育不肖視之以子也事人以父者  
必如其父而不欺教人以子者必如其子而不外此區

區之心尤恃其必獲也俯伏聽命下情無任徬徨激切之至不備

上顏朝奉

某啓前日嘗辱賜手書曲示存恤屬私事未定尋失裁報獲罪多矣先人弃養十年門緒哀隨兄弟仕官粗知所立手足相助日望起家先兄最孝睦行己端肅有古人法度不獨兄弟所愛敬鄉人尤樂親之年方四十三官至一尉平生所志未及開發一二遽爾推謝天罰何

大酷邪二子雖已勝衣可以奉後而田園廬舍久廢不治其中春須暫謀歸計使孤嫠稍安然後復還顧未得罷去為恨伏聞子由先生過彼數年之別一日會遇相與解斥世故講其學道之妙此賢者所樂也不肖安得與之志氣所同必見於酬唱使一咀餘味猶不陷溺於小人乃所願也中年多難觸事氣喪兩鬢蕭然輒已半白自悔少時務學鮮淺不求深趣區區所聞正在膚革今日思之大是謬悠爾此所以急聞救藥也見諭子由



先生云筭子中有佛書精要處此亦無可怪但至理無  
二言會於理便為真際井巷常談出於鄙夫鄙婦有與  
聖人合者理不外是故也鬼谷韓非之書推本道德時  
近玄旨二子安足知老子哉其言適中爾筭氏之時固  
未聞有佛縱有之亦不為佛觀其書者喻其理可矣安  
在學所問耶昔人有談不死者或從而學之未及門而  
其人已死猶恨其學之不早或曰自謂不死而其人已  
死乃誣也奚恨曰彼雖死安知其無不死之術正如筭

氏未知佛而其言有似之也先生以謂如何滕人來得  
雜錄一卷寫畢歸左右巽臺記更一二日可模單氏東  
園記方謀鏡刻此月未必得馳上新著必多願無吝貶  
教春溫不雨惟冀節宣自愛不宣

樂靜集卷十

欽定四庫全書

樂靜集卷十一

宋 李昭玘 撰

上鄆州安撫劉莘老相公書

某惶恐頓首百拜上某官閣下某元豐間作舉子同相  
公二令息登進士科後一歲復與今管城令偕除學官  
是時方執子弟之禮請謁左右相公亦以禮進而不拒  
也聽言侍坐茫然如循大海之涯莫能窺測一二退以

自許以謂寒鄉晚進望大人先生名德之重一造其門  
以得見為幸元祐初詔試入館相公位既顯德業益著  
天下之士奔走望風摩轂而至皆一時之豪傑相公坐  
政事堂為天子調緝百度道迎太平塞天下之觀望以  
得失為輕重外則為朝廷考觀人才內則相與講論經  
世之具相公固不輕於與人士之吐奇畫策者亦平日  
感慨自負不疑於有為也自惟涉道甚淺聞見鄙野氣  
孱志狹一無所長乘馬從徒陪三館之士出入掖門塵

埃風雨破帽自障蹢踉俯僂日復一日顧左右虎士如  
有愧色區區亦莫知其何為也同列之間俊異朋合吐  
辭論事伸眉抵掌方使雄向挾輶賈馬執鞭其後相與  
並驅周旋每坐其間不敢據席面熱氣第竟不能語闌  
闌如屋上鷗惟恐其彈射之將至也退而治事則磨丹  
和鉛鐫補字畫一見蠹蟲則惡而殺之獨不知無功而  
祿坐官舍食太倉黑頭利喙便腹蠢蠕月費三萬錢亦  
書林之一蠹也當此之時便有投効而去暇振衣彈冠

趨步王公之庭哉夫犯分而進不若知守而退使人可  
賤不若以賤自安往時雖數月未嘗一走門下者其志  
亦如此而已如某等輩雖百數十必無補於盛德之萬  
一猶能退自屏縮以冒昧為罪亦於相公進賢退不肖  
之道有助焉爾苟為不知此三日一謁五日一拜縱不  
蒙箕踞而慢罵亦門下之罪人也京居累年職事既非  
所安又迫以貧病求去甚懇累月未報猶以筵撞鐘幸  
其鏜然以應固不可得也伏蒙相公造物無間與之曲

成憐其無用之愚一言埏鎔獲遂所請被命奔迫束裝  
東歸洒掃敝廬上先人冢墓哭兄長於室問勞孤嫠飲  
食族子弟私願既畢徑趨官期度白馬之橫流覽鄴都  
之頽址浮清漳探滏口弔黎人之墟訪赤狄之祀如歷  
階升天底於上黨其地襟以三關帶以汾沁七國之時  
為韓邊邑趙魏倚以障秦而相為鴈行秦不破韓不敢  
循東山而下開元以來連絡六州為一大鎮騎太行之  
脊前扼幽并旁蹙鎮定當四塞之冲屹為完城亦形勢



之國也其俗儉嗇固陋克於自守爾我不相易故急衣食而緩節義重財賄而薄婚姻地高氣寒故堅忍而壽陵阜多川澤少故有餘於力而不足於智雖強聒難令而無椎牛發冢羣行剽劫之患斯有取焉爾上自秦漢下及五代阮趙卒封馮亭直盜兵之寃翦鳴辰之禍夾城之圍三垂之戰遺蹤舊事歷歷可按一米於此年穀既豐民訟希濶飽食而日有餘力山經水志斷碑遺史田野老人之語究其本未足以增益所未聞登高望遠

山川氣象負抱回合感事賦詩足以泄其羈旅之思不知為吏之勞而有官學之樂此皆相公前日之賜也幸甚幸甚日夜奮勵未知所報雖然士之為志也致一而已是非可否重輕利害衡之於心而照之以道無待於人人亦何與於我也要之不辱於終身之義自信其所為而不苟挺然中立不倚於物而姑從吾所好其為窮達用捨則有命焉爾如某之說雖相公之自處者猶若是也以身任國事宰平天下裁量斟酌合千萬人之情

同不齊之口愛憎毀譽動盪排觸紛紛藉藉特未定也  
日使百手百喙撫藉解釋必不能平惟相公應之不撓  
使物自為輕重去就而不相薄者為能洗濯其心一以  
待之而已士之與王公雖貴賤異勢苟為學先王之道  
要其自得之志未嘗遠也汶為東藩非勲德之盛無以  
壯京師而鎮方面股肱勤勞暫爾分逸西歸之召正在  
朝夕伏冀為時貴生還踐鼎席宗社永賴天下蒙福某  
官守拘隔末由參侍台座下情無任傾依激切之至不

宣某惶恐頓首再拜上

答劉秀才求先博士墓誌書

博士劉孝嗣也

某再拜伏蒙遣人寄示先博士行狀委之誌銘伏讀反覆  
泫然隨淚哽塞終日恭惟先博士文章議論器業風  
節卓然盡在人上士大夫知其名者莫不嘆息追憤願  
為之載述而猥先不肖理亦疑焉自念與先博士元豐  
初擢進士第名列奏籍有同聲之舊元符間攝事南都  
因緣聚首把酒笑語傾露肺腑情義款熟復為同好之

友古之人既曰故舊朋友凡有以赴患難託子孫者皆受之無拒不幸且死俾之書數百言納諸壙中以信後世乃餘事爾來使惠然必以此也幸甚幸甚某不敏輒逡巡再拜以辭固有說也某杜門屏處十餘年中間禍患摧併哭泣之哀相踵者七八志慮凋耗餘息僅屬忽忽如迷人未嘗涉書史窺古人制作之意筆硯塵涸覆弃地上不復收拾逮今事往痛定過意少適欲為小詩陶寫情性經營終日不能成章間得一二句瑣俗淺惡

正如劇兒行歌乞人擊節之語竊自鄙笑亦復慚恨竟與敗絮敝屣投之糞壤示不更作行年幾七十百事斤廢每遇天日暄和藉管擁絮坐墻下暴背摩腹氣血俱融頽然一寐此日用也其他種種現前不復經意若夫枯腸索奇字嚼齒造健語蓬頭搔鬢其色焦然傲偉於世俗牙頰之間固不暇也此某所以當辭而左右者不得不聽某之辭也必欲強其所不能使某不得以不能自免則一切荒浪顛倒苟塞來諭一聞於人百手指笑

足下方以顯親為孝而無以慰其心某之玷負先德亦不克終故舊朋友之義非所安也昔柳子厚死皇甫持正為文哀之知子厚者止如此而已韓退之為誌其事辨說明偉信非常人所能知者光芒一出千古不滅言足以發之故也足下欲以此意見屬實非所敢當必求諸能者毋勤來使幸甚某再拜

代賀方回上李邦直書

伏念犬馬之齒既壯且老望門下之日不為不久方未

冠時碌碌無所知識閣下應直言詔蘄然起北州策天下利害於天子之庭卓卓皆經濟大務傳之四方士大夫誦其言想見其人者摩轂而至某自量何如人不敢奉洒掃以從衆人之後竊以為慚後數年迫於致養遽從一官監門管庫義苟不辱坐則如窘木索動則與興皂等勤一忤上官訶詆隨至且虞誅責之不可脫則無以事親畜妻子故垂頭塞耳氣息奄奄崛然自奮之心日已微矣閣下位益顯名德日重一旦參領大政門下



之客皆一時豪傑而某之貧賤猥陋不改如平日縱能操尺紙之謁膝行下風門闌典謁之吏一覘其姓名已偃蹇不問左右青紫睥睨耳語不怪則笑雖某之心亦不能自信也故又逡巡中輟某嘗思古之王公鉅人出則為名世不幸不同其時不可復見時雖同而老死窮僻終身不得而見之者皆命也可以往見矣言不足以自媒力不足以自舉欲行而如有挽之者而又屢焉疑亦有命爾然以謂或出於人事之不齊者猶未志也比

江外代歸閣下方出鎮咸陽距京師二千里堂上之老  
不可去須臾升斗之祿甘旨不足蓋未能贏三月之糧  
褰裳以往也今則調官衡陽將浮汴達淮涉江漢絕沅  
湘萬一有逃於風波之患而長沙之南地苦卑濕昏騷  
人逐客悲吟歎息不自聊生非北州之士所能安也而  
又母老妻病子弱身復多疾一月之間飽食甘卧者不  
過數日方且日夕促促以鼓鑄為事金錫之氣薰灼腸  
胃叫呼咤咤驅策吏卒以赴其員程此賤者之事非敢

辭也自惟平生多艱小有所須動不諧適百步十躓一  
食三噎又安能必後日之志哉所幸守官彭門辱與公  
子有一日之雅今輒以悃幅自託繕寫所為惡詩若干  
篇上獻台座俳歌諧語之比試以閱之幸甚若夫渭水  
秋風倚樓長笛固未能挹司倉渭南一勺之細又安敢  
望李杜之波瀾哉區區之心伏惟左右憐其憔悴之餘  
無他好而已

代賀方回請見書

某聞古之士方其奇窮瑣賤未遇之時或束書裹糧周  
行四方跋山涉川冒犯霜露固非去墳墓之國而樂它  
邦舍安佚而好遠游也將欲覽天下之風俗交天下之  
賢士大夫收其聞見議論之益去其卑污固陋之弊以  
自成其所志者不得不然耳與夫抱殘編屏窮巷偃偻  
蹙縮端坐則面牆舉頭則礙屋幽憂沉寂志哀而氣促  
區區擬拾古人之腐餘與兒女子語欲望遭時而立功  
名者亦可鄙矣孔子曰父母在不遠遊遊必有方此古

之士未嘗不遊也昔司馬遷二十而南遊江淮上會稽探禹穴窺九疑浮湘沅北涉汶泗講業齊魯之都觀射鄒嶧過梁楚以歸若夫高山大川名都沃壤物產之著美士人之豪秀固已洽聞多識而昭澈乎胸中矣然後辨論古今馳騁千載之上下著書以名後世此有志者所為也某不肖生質孱懦未能強立而竊有志焉感慨先王之餘風想聞士大夫之高義惟恐身不及見而見之且不多也間者南遊梁宋東走鄒魯還過於滕滕古

侯國也山林深茂氣俗淳重宜有賢者為政於此某一  
至境上而閣下之休問溢於民言喜躍不自勝以韋其  
及見輒有請於執事者願一識風采而服其緒論惟閣  
下受之而已

代四兄求薦舉書

某聞萬金之賈陸駕大車川浮巨舶南窮甌越北極胡  
漠龍皮象齒文犀紫貝夜光之珠照乘之玉一旦得之  
則深居大第拱手待價通侯巨室先之以將命繼之以

飲餽以幸一閱方牀大案藉以藻繡大僕挾扶逡巡而進革匱十重綺囊十襲整襟濯手而後發照爛錯落神動心悸徐問其價則以千言萬以萬言億下酬之則勃然作色中酬之則掩口而笑上酬之則躊躇不欲而後應蓋所得者重則所予者不欲輕故也販婦販夫陸拾棗栗水捉螺螄足數指禿暴露風雨罄其力不過一鈞之舉計其價僅足一日之食正晝過市欲人問之而未嘗顧也日暮人散鷄棲於埘豚歸於豎突未及薪釜未

及粟其色焦然揭之則屢用弃之則可惜皇皇扣人之  
門戶幾何不悲吟行乞矣此其意何也所養者薄而所  
售者急也蹈道之士被褐懷玉志足以輕王公氣足以  
驕富貴致恭盡禮則見之誠親心合則交之非其徒招  
之不来非其義就之不見嘗恐山之不深林之不幽世  
俗之人將逐其後也又何嘗以半通之綸五斗之粟折  
腰下邑蹶蹶於人睂睫間哉若夫道不足以任己才不  
足以驚世其志懦而卑其器拘以迫使之效一鄉任一



官輕趨疾作以應期會指呼不知勞訶叱不知辱如轅  
下駒顧一束芻垂頭塞耳不憚鞭箠當是時又何暇議  
高節卓行矯激自負哉雖悲吟行乞亦所不恤也某生  
質頑昧讀書二十年三試不第晚從蔭補得官下邳碌  
碌獲佐大邑生齒繁浩簿檄填委勾考之詳出納之吝  
日夜砥礪計功補過苟免罪負中心所幸者一薦狀耳  
薦狀所願者一縣令耳今則已踰兩考未能如格搖搖  
引睇于門下者日夕以之終亦不敢以鉗結自廢也恭

惟閣下道德在躬仁恕成物屬部之吏洗滌出塵泥而  
脫枯槁者固已多矣以某不才何以與此然而竹頭木  
屑無間於大匠之手牛溲馬勃不弃於良醫之門此某  
之心猶有待也昔者莊子舍於故人家故人命孺子  
殺鴈而烹之孺子曰其一能鳴者夫能鳴者則矯翼而  
飛不能鳴者則合喙而死如是則某今日之言不得不  
聞於左右也伏惟閣下貸其僭易憐其幾成出一手而  
挈之康身之報不敢為衆人後伏惟聰明亮察幸甚幸

甚

樂靜集卷十一

欽定四庫全書

樂靜集卷十二

宋 李昭玘 撰

賀太皇太后生辰表

候屬西成屈金方之正氣時生上聖配天德之鴻休聲  
文所臨舞蹈同底中謝恭惟太皇太后陛下母儀恭肅  
坤德靜柔弼成永圖休有顯烈三光明而四時節九功  
叙而百度熙恢基業於無垠躋民物於交泰文武之興

周道華胥之贊軒圖迪是芳風翼超治古臣守職藩佐  
叨榮聖時觴獻萬年莫預造庭之列心肩一節徒傾就  
日之誠宜益介於延洪庶克符於頌祝

賀皇帝即位表

臣某言伏奉三月五日詔書恭承皇帝陛下虔奉寶圖  
踐登宸極震雷一發聲赫四方大寶繼升光被萬國生  
靈鼓舞動植昭蘇凡在撫臨無不欣戴中謝臣聞盛德  
之後世有天下有道之國篤生聖人恭惟陛下席六帝

之洪休對三靈之丕眷仁孝純乎天至聰明茂於日躋  
岐嶷之間已能動娛先帝號令之始足以慰悅衆心社  
稷有所憑依神祇以之安樂皇天右序復開命武之符  
率土祇驩行見紹堯之化臣限拘符守阻造闕廷無任  
舞抃蹈踴之至

賀太皇太后表

伏承太皇太后誕膺寶冊同攬乾綱號越常尊禮隆無  
上孝慈交感遐邇祇歡中謝恭惟太皇太后陛下柔順

在躬聰明齊聖輔佐英帝肅陰教於六宮保鞠先朝端  
母儀於萬國載加盛典允答徽音揆日以升均照臨於  
南面與天同久擁康樂於西朝臣限守藩符不獲趨詣  
闕廷無任瞻天望聖舞抃激切之至

進奉賀皇帝登寶位上絹表

大人繼明神祇協相四方來賀玉帛交馳仰罄懽心畢  
輸邦物臣猥叨符守阻觀帝閣敢陳在篚之儀少助充  
庭之實

謝告諭表

伏蒙聖慈特降勅書告諭臣即時集官吏軍員將校僧道百姓等宣讀訖睿智纂圖深恤艱難之託邇遐聽命戴銜撫育之恩中謝恭惟皇帝陛下純孝在躬至仁感物奉時昭考將圖天下之安咨爾庶邦使知王者之志臣猥叨符守誕布德音坐食見堯盡識宅宗之念謳歌歸啟共迎極治之期臣無任瞻天望聖感戴激切之至

賀冊皇太后表



伏承皇太后允膺寶冊增奉鴻名大孝隆親事光墳史  
萬邦蒙福喜極人神中謝恭惟皇太后陛下育粹坤元  
服勤陰教輔佐先帝志在靜柔保鞠聖躬德惟均一式  
彰懿範推講盛儀祇答懿慈盡明王之要道誕敷徽命  
鼓百姓之歡心臣限守藩符不獲躬詣闕廷無任抃蹈  
激切之至

賀冊皇太妃表

伏承皇太妃誕膺徽冊增奉隆名凡在邇遐孰不抃蹈

中謝恭惟皇太妃陛下慶傳貴緒瑞發靈源率嬪御以  
靜柔奉蘋蘩而蠲潔屬真人之纘紹推盛典以褒崇懽  
動宮闈事光史冊臣限拘藩守阻造闕廷無任抃蹈激  
切之至

進貢綾表

禹分九州均節諸侯之貢周建太府校登天下之財入  
之必以其時制則各從所有方帝仁之愛養滋物產於  
盛多追講舊經畢修常獻臣猥叨符守獲奉歲輸敢陳

在籩之儀以助充庭之實

賀興龍節表

四序周而在朔方成一歲之功二陽進以為臨允叶大  
君之吉篤生真主奄有庶邦紹六帝之休光懽兩宮之  
孝養車書所暨舞蹈攸均中謝恭惟皇帝陛下聰明日  
躋智勇天錫應千齡而出震操大器以乘乾虎嘯龍翔  
共覩聖人之作風行雷動坐躋萬國之寧衆賢濟濟以  
在朝至化新新而美俗三靈助順六氣薦和人情胥悅

於謳歌天祐沓來於福祿將窮冬律俯屬誕期載瞻虹  
渚之祥竊竒封人之祝恭默思道允懷上帝之心安樂  
延年永邁南山之壽

慰皇帝表

今月日神宗皇帝小祥者渭水衣冠想神明之如在石  
門霜露驚日月之難留中謝恭惟大行帝澤被生民道  
躋曠古收成功於六閏垂鴻業於萬年欲窮海上之山  
遽厭人間之世言未忘於在耳歲已換於終星皇帝陞

下孝極事亡念深率考盡憂勤而續禹感冥漠以見堯  
維練服之將更結聖衷而永戀昊天罔極春露既濡雖  
哀不可忘顧奄經於時變而禮當有節庶下慰於人情  
臣限守藩符不獲躬詣闕廷無任激切屏營之至

慰太皇太后表

日月變遷人神感惻中謝愛深母道慘結聖衷覬少順  
於天時庶下安於人欲

闕

賀玉璽表

大明當宇百辟造朝翼赭案以前登發金箱而跪進靈  
光煥耀虹氣屬天妙刻蜿蜒龍文照日作乾安之樂奉  
天子之觴誕布宥恩敬謝宗廟慶流海宇騷動人神實  
曠古所未聞宜四方之來賀中謝竊以明德在御嘉應  
並臻蓋天將有示於人故地亦不愛其寶至神變化非  
意所知和氣薰蒸為時而出惟珍符之肇見錫景命以  
來崇眷懷本自於帝心追琢疑非其世造學者之辨無  
以稽諸史玉人之巧莫能喻其工不必論前世之所遺

要非偶聖人而不受恭惟皇帝陛下仁孝率考嚴恭事  
天朝廷治而庶官修陰陽和而五穀熟百神協相四表  
乂安宜保無疆之休以稱甚盛之德靈芝朱草非難致  
之物神鼎丹甑不足効其祥非假秘文孰昭休貺昔堯  
享封人之祝漢聞嵩岳之呼曾未若躬承受命之符永  
為守國之器聖作明述方啟佑於千齡史書樂歌將有  
辭於萬世

賀元符改元表

准勅自紹聖五年六月朔已後改為元符元年神休沓  
至昭示聖時歲號更新欽承天意布宣萬國鼓舞羣情  
中謝恭惟皇帝陛下德感通三靈眷佑諸福之應緣  
類而來明照下土則神光燭天澤潤生民則甘露如雨  
欲付以享邦之慶又申之受命之符皆前世所罕聞不  
踰時而來上載諸簡冊播之聲詩猶未足著無窮之傳  
復何以表非常之貺大將詔世宜重紀元太史編年無  
愧祖宗之美明堂頌厯永同天地之期



樂靜集卷十二

欽定四庫全書

樂靜集卷十三

宋 李昭玘 撰

賀皇帝即位表

臣某言正月十六日准進奏院遞到制書皇帝登寶位者龍德時升紹一王之休運天恩下霈鼓萬國之歡心凡在蓋容一歸撫御中謝竊以可托天下必允屬於真人克享帝心實有懷於明德恭惟皇帝陛下聰明齊聖

歷數在躬孝悌感於人神言行動乎天地奉兩宮而無  
間就外傳而弗煩道學生知德心日邁宜先王之眷命  
付大器以受民二聖嗣興益隆乎世祚一道相授蓋篤  
於天倫謳歌朝覲之有歸禮樂政刑之具在享七世崇  
高之業應萬年熙洽之期繼體元豐均是吾君之子承  
華紹聖載安百姓之心永孚四海之休咸賴一人之慶  
臣限拘官守阻造闕廷無任抃蹈激切之至

賀生皇太子表

臣某言伏覩進奏院報今月八日降誕皇子者太史觀  
天已識前星之應大人占夢果符男子之祥喜溢宮闈  
慶均海宇中謝竊以誕彌厥月有開后稷之先則百斯  
男於顯文王之盛由人神之相與荷福祿之無窮恭惟  
皇帝陛下孝安祖宗仁遂動植疏爵賞以繼功臣之世  
發廩庾以惠天民之窮廣大德以好生示神武之不殺  
萬事咸理允格丕平四夷皆來實獲多助三辰昭鑒六  
聖具依載錫洪休篤生元嗣至誠能動無待薦高禩之

牲流澤有源何煩種北宇之行况乃岱祇見象媯聖呈  
光共扶萬世之基來兆一人之慶岐嶷之性先自得於  
神靈聰明之資將弗煩於師傅大本有系衆情以熙臣  
猥服外僚親逢盛事上南山之壽阻預班聯誦螽斯之  
章莫知鼓舞

謝永興路提刑到任表

從事府僚訖無善狀詳刑陝部遽忝誤恩祇命入彊撫  
躬失次中謝伏念臣學非知輿才不逮中晚掇辭科濫

登仕版猶未棄詩書之習初不更州縣之勞講藝泮宮  
無以應諸生之問校文芸閣莫能窮未見之書朝廷勸  
課之甚優事業空疎而幾廢低徊末路慙負盛時未嘗  
赫赫以動人姑幸循循而寡過勉從吏責出佐藩方甫  
及再晷而還寢遷大伊之佐顧浩穰之多責益黽勉以  
自持實有愧於吏能偶遂逃於官謗屬以田廬蕪沒兄  
弟凋零孤窮不收嫁娶未畢事君之義固內外以一心  
在臣之私有出處之異勢屢彈愚懇過覲使州豈謂天

能聽而弗違日雖幽而必照不加以罪曲盡其情特優假於使華俾分持於邦憲量材非稱冒寵若驚況關中之奧區為天下之劇部廣輪者三千里襟帶者十八州氣俗喜爭動成抵冒山林多阻易致奪攘必得通明之才以均察治之寄如臣凡闇遇事濶疎雖知任大而盡心尤恐力微而敗責此蓋伏遇皇帝陛下性齊舜哲政邁湯仁表德禮以示人亶誠明而格物將使路遺不顧人有夷齊之心田畔相推家成虞芮之俗臣敢不仰思

欽恤俯務靜安閑於無事之時衡以至公之聽鄉隣不  
擾犴獄無留擔彈夙夕之勤力圖毛米之效澄清之志  
非敢望於古人忠厚之風期少裨於聖治

謝京東西路提刑到任表

詳刑陝右已乏事功易部畿東再叨恩旨量材非稱戴  
寵若驚中謝賦性迂疎聞道蹇淺沾濡薄祿游泳聖時  
學文未去其陳言從吏不聞於善狀亦嘗陪書林之豪  
秀佐天府之浩繁必有可觀未始錚錚而驚世竟無他



異但能碌碌以同塵屢懇使州遽分煩使事滋多而智  
窘責已重而心危勵志竭精知憊愚之無補累日易月  
顧罪戾之益深久玷官聯坐縻廩給方申前請復俾就  
遷既奔命以戴星徒搖心而望日惟京都之近壤連海  
岱之故區生齒實繁獄訟惟允豈茲孱緩可使澄清攬  
轡登車慙非任使過家上塚預有光榮此蓋伏遇皇帝  
陛下堯性自天舜功成物措世於中和之地道民於禮  
義之風將使四海為家有外戶之不閉羣生咸遂無一

夫之向隅臣濫總刑章恭承德意敢不究心審閱先事  
禁防寬猛以和上下無擾勉立消塵之效仰酬覆載之  
恩

謝移京東東路提刑到任表

承乏再朞訖無裨報易官東部尚玷恩榮循省已還兢  
凌失措伏念臣學非稽古才不過人晚登仕版之榮寢  
通朝籍之貴兩叨持節三見周星疾病相仍安恤陰陽  
之患精神俱耗空言犬馬之勞多慮近迂積憂成畏姑

幸屏心而遠罪未嘗飾智以近名審閱獄辭唯恐失好  
生之意芟除偷黨庶幾移瘴惡之風間屬年穀順成生  
民咸遂桴鼓之驚幾息桁楊之繫亦稀皆神明之化陶  
成非奔走之臣能預方將束裝待罪指日言歸豈謂寬  
恩復更華使去長安之日雖遙千里之圍望岱宗之雲  
猶均一雨之潤文書有報復之速吏卒無將迎之勞昔  
乃吾隣盡為屬郡今雖別部曾是故僚顧如此之便安  
實非臣之覬望而況全齊大國瀕海奧區水極魚鹽之

饒陸多桑桑之美大姓挾貲而犯法細民禦貨以為姦  
非有強明之才孰分察治之寄自惟迂暗難稱使令此  
蓋皇帝陛下憲天聰明體道變化紹復先王之政圖終  
寧考之功御一世之英豪納四方於仁壽夫何微品亦  
備下僚謂臣無它已嘗試之任使察臣寡過猶將責以  
事功蓋天地至大而無私日月雖幽而必照敢不勉修  
官責祇奉憲條察辭于差庶不愆於明慎除惡務本使  
無害於善柔誓有補於涓塵期少酬於覆載

知滄州謝上表

禮官失職甘俟嚴誅邊壘析符尚叨優寄以不可貸之  
罪蒙非所望之恩驚魂既還零涕無已中謝伏念臣迂  
疎無取選輒不持惟知任物以直情不善周身而避患  
每事必問已失仲尼之前知三思乃行終違文子之常  
誠一昨奉太母因山之制謹百官趨事之期夙有司存  
各以類舉逮壽宮之易奠道虞主以告行竟達空函幾  
敗乃事既身為之官守反自闕於禮文仰誤神靈之依

中櫻仁孝之感過莫大者誰其歸之固當戮以市朝可  
復付之民社眷浮陽之封壤控北敵之喉襟澤浸際天  
雖馬牛之弗及風聲屬耳實鷄犬之相聞宜得望人以  
壯方面敦詩說禮鎮以靜安緩帶輕裘應之閒暇况乃  
大河泛溢之後一方飢窘之餘必先謹養以惠和尤在  
周知其疾苦如臣孱暗非所克堪此盖伏遇皇帝陛下  
天地同仁日月齊照澤及行葦每思視物以如傷網漏吞  
舟不忍向隅之獨泣聊褫官而示罰猶守土以長人敢

不砥節奉公肅心悔過盡為臣之道於事無難推愛國之心以民為本誓殫夙夜少補毫分觀海知瀾宛隔蓬丘之望舉頭見日長存魏闕之心

謝落秘閣校理表

備校讐之列久玷寵名委按察之權尚叨華使退慙僥倖復荷矜存聞命已還省躬知懼中謝伏念臣學術淺鮮器識拘疎偶中詞科濫登文館日見羣書之浩博坐逃俗吏之紛囂物或儻來敢怠若驚之戒義難苟得每

懷非據之憂何敢取容屢嘗求解逮俯從於外補猶竊  
假於前稱不自請陳寢成冒昧索驪珠於魚目已失諸  
真衣羊質以虎皮終非其有宜循名實無柰故常被  
寬恩上還虛授此蓋皇帝陛下紹隆先烈總核百工予  
奪必盡其公各從分守內外一歸乎正無忝司存亶堯  
智以知人博舜仁而愛物養之庶恥収以事功臣敢不  
勉激愚衷益勤吏責天地之造難補報於生成犬馬之  
軀誓糜捐於驅策



謝降授承議郎表

臣某言八月二十二日都進奏院遞到告一道特降授承議郎差遣勲賜如故臣尋跪授訖禮官被黜方在退思勅命示懲止從薄責重干文憲疊負釁玃撫己懷慙感恩零涕中謝伏念臣斷斷不敏碌碌何知初無奇勛以動人每以疎愚而取禍詩禮之訓幼則嘗聞刑名之書素所未學偶預都司之進擢適當常憲之變更宰府付以官僚惟命所赴法吏摘其帑尾謂可則書文既失

於舊章罪寧逃於顯戮止從貶秩尚玷承流雖天地無所不容而犬馬何以為報此蓋伏遇皇帝陛下聰明睿智以獨斷慶賞刑威之必行遵制揚功永懷善繼亂名改作先務謹誅謂使人知過則能盡其忠故用罰以寬而終歸於恕臣敢不省身夙夜砥節事功知無不為庶竭事君之義死而後已益堅報國之心

謝復官表

天地既交適契施生之序雷雨方作悉霑曠蕩之恩歸

復官資洗除罪戾莫知手舞但極涕零中謝伏念臣材  
非過人學不知道濫登仕版誤置書林必有可觀未始  
錚錚而驚世終無他異但能碌碌以同塵遠躡省闈遽  
參宰屬偶官僚之有請謂國憲之當更初無預於講論  
漫不思其抵謬罪同破律議在謹誅止鑄階秩之微聊  
殿籍書之末豈謂矜前車之既失開局步於自新川澤  
納汙一歸曠度父母愛子皆出至情此蓋皇帝陛下克  
性生知舜聰遠格庶事憂勤而協帝小心寅畏以事天

常善救人恐匹夫之失所為能盡物期一視以同仁曾  
是孤生亦蒙聖澤併還舊物復領真祠官守不出於田  
廬家食盡資於廩粟葵藿之心常在終幸照臨犬馬之  
力已衰空慙養一無裨報獨負生成雖已寢於桑榆  
顧未填於溝壑猶能中田擊壤日陪野老之歡聲清夜  
焚香每致封人之善祝

謝出籍表

滌瑕蕩穢共承雨露之霑濡振衣彈冠莫知手足之抃

蹈追惟前日感涕厚恩中謝伏念臣生也有時仕而無  
學智識非遠議論甚卑每慙事往而知非不悟才疎而  
多累兩干吏議三丐宮祠額白不可以遘河猶叨養  
帷敝或堪於裏馬未即弃捐間者上帝降康大祇薦瑞  
備成寶刻均福蒸民敢期負釁之餘生亦預竄名於載  
籍此蓋伏遇皇帝陛下愛人無已視物如傷賞罰之公  
時乃天道予奪之節本於人情法以示懲亦既屢更其  
歲月過而必改誰將自棄於君親曲示函蒙一從湔拭

而臣計功無取蹈悔良多載省始終莫酬萬一蓋嘗喻  
父老以戴上之美意教子弟以事君之小心長歌天保  
之六章百拜封人之三祝雲天在望但知傾日以為心  
溝壑未填尚冀殺身而報國

謝八寶赦轉官表

甫除罪籍遽進文階望遠雲天特預一時之澤先生簪  
紱如非前日之身寵至若驚感深成涕中謝伏念臣材  
猶社木性實絀人初非可用於時終有自貽之悔間屬

禮陳八寶慶洽萬邦赦其既往之愆開以從新之路雪  
霜制物天將使之成材鞭扑御家父無終於棄子矜憐  
舊物安養殘年復陪多士之步趨再奉真祠之洒掃已  
踰望表仍玷序遷未聞圖報之一端併荷流恩之三錫  
此蓋伏遇皇帝陛下大道善貸至仁無親凡百姓皆得  
其心靡一物不遂其性聖功丕冒瑞應並臻嘉與庶工  
共承多福而臣偶緣幸會濫服寵休簾籥蒙璆既容可  
錄支離受粟尤愧無功敢不誦明訓以刻肌披愚衷而

指日儻萬分之有補雖九死以如歸



樂靜集卷十三

欽定四庫全書

樂靜集卷十四

宋 李昭玘 撰

代人賀元圭表

欽承休貺叶至日之迎長肆設盛儀闔萬邦而來賀列  
華紳而星拱翼寶盞以階升上公䟽進而前天子再拜  
以受大樂備九成之奏羣臣奉萬歲之觴麾幡縹緲於  
祥風雲物冲融乎和氣人神胥悅霈澤橫流以答自天

之休於昭不世之瑞曠古盛典一時榮觀中賀自昔陶  
唐聖神獨運惟時文命水土既平歸我帝功薦其器寶  
謂俊德克明者本於智黎民於變者生乎神用此以知  
人而人績成推此以則天而天道順故外黑以示智之  
所出內亦以顯神之所存顧強名莫得其緒餘惟默識  
可求諸形制書猶具在世獨無傳三代下哀曾莫聞其  
付予兩漢甚陋終不發於沉潛天心未有以感通人意  
亦難於窺索綿歷歲時之久寂寥霄壤之間爛然光明

了不利缺蓋上穹眷佑有待治時而神物護持乃至今  
日恭惟皇帝陛下儲精稽古恭已愛民聽言同衢室之  
詢化俗猶大章之作兢兢以行道巍巍乎成功家陶德  
化而可封人競恥心而不犯亦堯之盛與帝而俱屬景  
命之方興果珍符之來格學士討論而不謬工人辨閱  
以無疑再考祕文益詳嘉應得玉璜於磻水何乃不經  
出寶鼎於汾陰是誠小物固宜告圓丘而饗上帝拱南  
面以朝諸侯迎福祿之大來對天地以同久臣親逢熙

旦猥預下僚彷彿闕廷徒極望雲之想婆娑田里聊陳  
擊壤之歌

代濟州命官學生道僧耆老請皇帝封泰山乞車  
駕經幸本州表

竊以封禪大事古昔有聞數千百載之相望時難偶值  
七十二君之可記遺跡尚存非至德無以動天惟聖人  
乃能行禮義當有請時弗可違衆議所同不謀而合輒  
殫愚懇上瀆嚴宸中謝恭惟皇帝陛下亶聖智之才邁

帝王之德仁被動植孝感神明朝廷正而庶官修庠序  
興而衆賢出禮極商周之盛樂同韶濩之和四時序而  
五穀順成九澤通而百蠻請吏困窮有養囹圄屢空為  
道難明視古無並萬邦咸乂豈惟同德之三千百化已  
成何獨大功之二十三靈協相諸福薦臻太史書祥殆  
無虛日與人頌聖如出一辭冲融六合之間充塞太和  
之氣元圭載出垂眷甚休青帝來臨示人尤著當躬行  
於昭報無久曠於上儀必展時巡用虔祀事顧茲東土

有曰泰山泰言作鎮之尊東乃資生之本羣靈之府衆  
岳之宗近在大邦素為福地升煙中頂可近接於皇天  
檢玉圓臺亦深明於精意不特享一人之慶蓋將蒙萬  
世之休幸詔諸儒敷求故實矧規模之具在皆耆老之  
能言追真皇已講之文請從今日繼神考方興之志奚  
俟來年惟麟野之舊封附陶丘之大邑去畿無幾視魯  
為隣路固少於縈回地尤多於平行萬人無擁六馬不  
勤纔經清涕之郊圻已見東山之雲物伏望皇帝陛下

曲從人欲俯屈帝尊邈日馭以啟行揭龍旗而來幸肅  
傳鳴蹕徑取便塗舜禮方修敢願陪於羣后堯車儻過  
竊有效於封人庶仰矚於清光不虛生乎盛世

## 第二表

投寸筵於洪鐘固知難動納細流於滄海尚或能容是  
誠力所不量恐亦行之甚易躊躇欲却僂俛復前中謝  
竊以奉牲玉於圓丘以展報天之禮潔粢盛於泰折式  
昭事地之儀此皆有國之常經未盡聖人之極致非升



中不足以對上穹之佑非降祀不足以接厚載之靈自  
伏羲以來斯焉可考由祥符而後今則其時敢布懇辭  
再干宸聽恭惟皇帝陛下聖心天縱神化日新造士訓  
官羣俊在位制禮興樂習俗已成木索俱閒倉箱徧溢  
犀利蒙皮而不試遐荒削枉以來庭洋洋乎歡樂之聲  
恢恢然仁壽之域精神之妙既已和同天人糟粕之餘  
猶將陶鑄堯舜冬祀方修而清真格韶音纔作而白羽  
來大功爰葉以升聞諸瑞紛綸而畢至草木山川之勝

競出珍符日星雲露之精次垂喜應不為創見非止一  
書此皆前古之罕聞何獨大封之未舉惟岱宗之作鎮  
在方岳以居先巖巖之望尤高生生之德滋盛神房阿  
閣即先聖所棲紫蓋黃光盡吉祥之氣舜帝時巡之禮  
具載遺書真皇夢感之靈竊聞殊貺伏望皇帝陛下躬  
行升降丕答顧懷鶴髮相扶每共談於古事鑒興來幸  
將復望於清塵宜奉三神之驩以錫庶民之福雖貶成  
抑定謙不自居而附厚增高禮寧終廢是弗為也尚稽

檢玉之期侯不邁哉徒鬱搢紳之願載言大野俯次輔  
藩參考舊經最為便道五百里之非遠東北望以甚平  
乃汶陽接畛之區正羽衛徐行之地幸頒俞旨夙戒候  
人煌煌華蓋之來四郊風動隱隱春雷之轉萬騎雲從  
臣某等夢寐傾心掃除先路進陪朝序敢希闕里之榮  
親見聖時誰復周南之歎

第三表

盥手奉章鞠躬俟命望雲雖劇伏地無從獻一得之愚

已幾哢哢下十行之詔尚復遲遲中謝竊以因崇祀以告成禮當有報為生民而祈福意本無私乃上聖所優為亦下情之公願凡在照臨之屬莫知鼓舞而來稽於衆則可從冀蒙兼聽至于三而必瀆敢避多言筮日之良瀝誠斯迫恭惟皇帝陛下化行俗美治定功成陰陽天地以流通禮樂刑政之明備丁寧德意孰非堯舜之用心熙廣聖功不忘文武之勤教交萬物以道得百姓之歡衆賢並興五兵俱偃養材有本造小子以詩書懷

遠無方裂殊隣為郡縣九年粟腐比戶錢流惇獨孤窮  
飽餘糧而鼓腹析楊纏索掛空犴以凝塵朝廷胥樂於  
清明田里茂聞於愁嘆馨香有感惠澤無垠共陶一炁  
之和徧為諸福之應元圭發見上帝降觀九霄光明日  
有戴氣千里澄澈河無橫流甘露歲蕤寶山萃律竹實  
供九苞之食野蠶增卒歲之衣雙蓮駢花不並生於庶  
草赤烏白鵲獨先至於四靈淮人瞻宰堵之光嵩阜示  
高真之相嘉穀動盈乎拱把瑞文繼出於山林九臯之

鶴蔽天同傾萬目五色之芝連籬幾困十夫禮部受圖  
歲嘗百數外朝稱慶日或貳參呈露紛綸變化奇詭事  
出乎見聞之表意存乎象數之間騷流聲詩光動簡冊  
此太平之極致何危危乎彼載籍之所傳特小小耳惟  
天之垂眷者甚厚故民之報上者益勤圓丘方澤之齊  
嚴未為之稱束帛金錢之慰遣詎已其來必先喬岳之  
封允答三靈之眷庶弗違於上下亦曲盡於情文庸示  
光揚非為進越博士濡毫於冊府夙備討論封人側耳

於路隅屢從汎掃載稽前古無越此時雖退託以未遑  
顧久留之何待蓋曠世罕逢於盛際况舊章非設於空  
文今復仰冒嚴誅堅陳丹懇韋稍迴於淵慮難終抑於  
輿情魯邑儒冠已顥顥而北嚮岱宗雲物每靡靡以西  
來伏望皇帝陛下追祖武以聿修奉天時而順動自大  
野達東山之境導屬車無五日之行良出便安最為平  
易填金祕冊罄一人昭事之心刻石層崖張萬世無前  
之烈訪仙閭之縹緲觀海日之騰陵百神之御皆來萬

歲之聲相屬回鑾夷路瘞帛崇壇麾仗雲屯琛貢山積  
先端冕以受四方之賀大作樂以舉諸臣之觴躬問高  
年畢修羣祀尊儒闕里欵帝真庭賜酺飲以交歡欣濡  
德音以蕩瑕穢榮光均被慶賚並行永孚宗社之宏休  
丕顯帝王之能事臣某等敷言累牘引領踰時恍迷丹  
闕之岩峩想見翠華之髣髴躊躇終日搖役寸心奏帝  
典之一篇慙無宿學望聖人而三祝竊効前驅

代賀平瀘賊表



勇校鷹揚赫天聲而莫禦窮陬電掃殲鼠類以無餘三  
捷告旋萬方交慶中謝臣聞漢闢犂犂之地始定南夷  
蜀興瀘水之軍寢通諸夏雖屢更酋族時擾疆陲固不  
煩浮以六師止可以驅之尺箠夫何狂醜敢黷皇靈謂  
中國之兵不習山林之險聖王之法必寬夷獠之誅輒  
肆披猖自媒剪覆以至虎臣受略輶使移輸先櫻必死  
之喉襟大索已窮之淵藪踈頭顱於川谷卷廬落於仄  
埃何能逃螻蟻之生無復恃螳螂之臂風馳旁徼魄落


諸蠻伏惟陛下聖德靜淵武烈神速萬全之勢灼見於  
目中千里之師焱來於天上以山壓卵如火燎枯子無  
遺兇少快宿憤昔方叔之征玁狁柔服蠻荆貳師之伐  
大宛震驚西域跋觀遐俗畢附中邦臣素荷國恩忝分  
符守喜聞寬詔竊助歡聲飲至行封莫陪於周廟頌功  
稱壽徒望於堯天

代知徐州馬大夫謝上表

祇擇時日初見吏民當朝廷訪落之時各修其職濫師

帥長人之寄徒愧於名撫已知榮感恩欲涕臣某中謝  
伏念臣斗筭淺器畎畝孤生遭遇聖明因緣仕宦亦嘗  
登進言責披瀝肺肝分貳計司運量金谷載更使指出  
領憲綱未歷歲時遽銜哀恤養既違於將母義當許於  
致身逮賜對於天光復轉輸於嶺表出入谿蠻之徼馳  
驅瘴霧之中以革裹屍分捐邊野舉頭見日莫望長安  
方撫水之繹騷病師糧之難給粗完經費遂致招徠幸  
蜂蠆之無虞顧形骸之可乞猥蒙寬詔退守真祠屬瘴

疹之稍平奉詔恩而入對荷先帝神明之照知孤臣忠  
梗之心假以便藩養其暮齒惟徐方之興壤實蠻服之  
舊封井邑浩繁風俗剛悍宜資名德以賴藩宣夫何妄  
庸輒膺任使此盖皇帝陛下道膺堯智德邁湯仁謂犬  
馬有一日之勞簪履乃昔時之御曲加完愛詎思棄遺  
臣敢不勉激吏能奉行德意桑榆雖晚未忘幼學而壯  
行金石不移敢有先難而後易少立涓埃之效上酬覆  
載之恩



樂靜集卷十四

欽定四庫全書

集部

樂靜集卷

十五至二十

詳校官庶吉士 臣 陳若霖

侍讀 臣 孫球覆勘

總校官中書 臣 朱 鈐

校對官中書 臣 李 荃

謄錄監生 臣 莊文煜

欽定四庫全書

樂靜集卷十五

宋 李昭玘 撰

賀河中府經略游龍圖

此者伏審肅拜恩綸榮遷帥閫經畫歸乎素業注倚出  
於上知成命甫行縉紳相慶恭惟某官學通聖奧識照  
事微抱忠義以有為喜功名之自致暫將使指頓實兵  
儲坐馳智筭於幄中生致羌首於闕下功高百戰聲屈

四夷初進躡於書林旋入登於卿寺游心魏闕暫勤三  
節之趨厭直承明遽起一麾之請惟秦亭之興壤為  
邊邑之具瞻特賴名臣作鎮方面廉頗尚壯必寬西顧  
之憂靈武可平佇報東門之役行膺詔握入贊帝猷某  
方幸依仁繼聞易地尚期展晤少罄叙陳

與虢州孫學士

此者濫被宸恩誤叨憲領量材非稱負寵若驚幸緣聯  
事之榮遂獲見賢之願恭惟某官天姿俊拔國器宏深



早擢卷科寢揚撫仕行義足以範模多士文章足以粉  
澤太平步履瀛州俊聲莫競翺翔蘭省賢望益高方虞  
侍於親闈屢懇求於藩服大邦作屏暫資善政之才四  
輔維人允屬元功之後徑趨召節入覲凝旒某晚接英  
游並登策府奉一介之使將觀大國之風啣盃酒之歡  
良幸故人之遇方圖奏記先屈飛緘感服之私誦陳莫  
究

上開封府蔣待制

言念少學屬文嘗起執鞭之慕晚從試吏濫陪入幕之  
遊稍親閒燕之談良若喧囂之後遽緣補外遂失依仁  
鷦鷯一枝暫託蹤於美蔭鴻鵠千里徒絕睇於青雲仰  
惟剗決之餘休有吉祥之助恭以某官識周萬理學造  
大原以王佐而自期非聖言而不道躡聖科而特起軼  
後躅以先馳彈擊百僚皂鵬橫漢澄清屬部皎鏡懸秋  
優服使華增嚴帥領泉流六路半居天下之利源膽落  
諸羌獨出幄中之勝算重以儒林舊德延閣清班未親

日月之光屢從軍旅之政暫輟藩方之節制用釐天府  
之浩繁初落筆以無留不閱旬而稱治大點結舌情窮  
片言群偷屏心首戴一尹方久虛於近弼已密簡於上  
知意在東朝願未伸其素業天將大任宜永庇於斯民  
某竦服誨言悵拘官守地遙望履心劇戀軒浩蕩江湖  
何待飛鳧之集低徊鷺雀終懷賀厦之歸敢乞勉為邦  
家精調寢餽下情無任傾頌激切之至

賀新潭州張學士

疎聞譽命光奉恩綸解印陝郊作藩楚服伏深慶慰恭  
惟某官學通今古識際天人遇事敢為直躬無愧風生  
芸閣皆名理之談鶚立霜臺有忠義之色恥遂容身之  
計勇為去國之行列郡澄清蕭然虛囿九年饒富浩若  
流泉俯臨大國之封遽報朞年之政益隆宸眷更守名  
邦浮艤清湘聊適江湖之興懷鈎紫禁行追翰墨之游  
某猥以塵蹤竊攀英躅石渠舊事嘆從宦之飄流銅虎  
優恩期望風以髣髴方謀命駕先辱飛騰竚申伏謁之

勤少慰叙陳之願

賀新郢州韓待制

伏審解延州之屬郡領楚甸之名邦地介江湖之交物  
多魚稻之美國小而易足民淳而不偷蓋將優養其賢  
能然後遠觀其德業見匠石之斲固深識於道微聽陽  
春之歌亦自諧於心賞恭惟某官以學修性藏器在身  
久更獻納之勞暫資屏翰之寄存心虛靜與物去來易  
地之恩漸磐茲始賜環之召指日可期某限守官常阻

趨賓席仰祈保毓別對寵靈下情無任傾依之至

上事謝監司

服鄉校之官已非其任據先生之席尤濫於名蓋師不  
可以少知器必先於自治苟為無本何所取材竊祿太  
優反躬知懼伏念某性資凡闇學識迂踈素乏兼人之  
能誤當聞道之責聖賢可仰何容握管以窺天豪秀滿  
前良愧奔蜂之化蠋而況俯仰一室沈酣六經無簿書  
紛迫之勞有朋友講習之樂退惟僥冒宜自激昂敢不

考上下責實之時循終始脩已之效講道勸義庶無曠  
于厥官論世讀書將必行其所志

與交代先狀

右某言念傳洛中之價久已服膺傾塵尾之談未遑引  
袂比緣補吏偶被誤恩輒當鄉校之官將承賢者之緒  
幸隨願喜獲與愧并恭惟某官國器粹溫天材超拔應  
休期而筮仕拔上等以飛榮論議高深下荀揚而不道  
文章古雅揖游夏以相馳方君子之育才俾諸儒之駕

說橫經師席流化藩州洋乎盈耳之絃滿矣及門之履  
英豪輩出道德風移隱几絳帷已格泮宮之化懷鉛紫  
禁行追金馬之遊某猥以淺聞獲依成範奔蜂之祝化  
藿蠋以何能黃狗之皮補狐裘而終累行須體踐尚免  
曠尤瞻晤有期歡躍無已

謝趙判監

伏蒙判監朝請以某近舉再任特貺長踐者賢不肖天  
下所共知進與退君子之高致所難揜者甚公之論母



苟失者可仕之時自古當然於予何有猥蒙歸惠俱益  
懷慙恭惟某官立心有常好道不倦澹泊榮味怡安仕  
途嘗矻矻以窮年恥沾沾而自喜放虛舟於不繫歛倦  
翼以知還殆至絕交中散不堪於世累未能力疾士安  
無損於天和寢食俱忘乎典籍之間筆硯幾滿乎門牆  
之下以傳為癖將老未休為玄解嘲雖窮奚病妙得鍾  
王之骨直登李杜之壇錦囊不空斐几增重室中乏王  
老之氣味席上盡陳玄之子孫但存青氍獨無愧耳能

著幾履其好如何驚然與世以無營雅以絕塵而自許  
每容比德輒慕薦賢寧取不度德之譏庶逃蒙顯戮之  
罪敢來國士之報姑致衆人之言自以短絆無汲引之  
功一咲勞吹噓之助巫者祝人以千歲固盡誠心楚人  
售璧以萬金更求真賞

移京東東路提刑謝豐侍郎

此者叨蒙中旨就易東畿猥緣聯事之榮竊有趨風之  
幸恭惟某官儒林重器禁掖名臣文章追三代之醇議

論極六經之奧是非之智則確乎不拔進退之義則綽然有餘大德不爭知江海之善下晚節益厲見松栢之後凋暫輟從班出司留籥興王重地式賴於老成論道宗工必咨於遠業某素蒙知遇方獲庇依

滄州到任謝韓丞相

城高池深壯矣萬夫之守地大物廣富哉千里之封惟偉人可以折衝非惠術不能媾俗先朝脩禦雅資武略之長累世承平優假使華之舊如某者斗筭小器章句

腐儒自知斷斷以無他不善沾沾而自喜涉世每謀於  
揭厲謀身素拙於從違安以乘流自信河中之木疲於  
抱甕豈知井上之機才屢試而無聞志已衰而不警猥  
叨進拔稍獵等夷澤虞從大夫之招已乖去就小人乘  
君子之器自取顛危濶踈初出於智昏繆誤殆由於魄  
奪何獨有言之悔幾成不敬之誅屬大事之告終法雖  
可貸論有司之失職罪復何辭方且刻骨退思屏蹤待  
竄魯趙為禮莫知薄酒者為誰臧穀亡羊何但讀書之

無罪遽從寬典猶領名藩借朽木以可凋收弊帷於已  
棄此蓋伏遇某官股肱王體柱石廟堂裴度之才上所  
自用武公之後人無不宜大器以天下為公至誠得仁  
者之樂無一夫之失所雖小善以不遺曲全孤生尤被  
厚賜雖江海之量無待細流之歸而鷺雀之軀寧忘大  
厦之託誓殫夙夜少補毫分悔不可追願何功於犬馬  
老當益壯庶有得於桑榆

樂靜集卷十五

欽定四庫全書

樂靜集卷十六

宋 李昭玘 撰

答王賢良

與黃安中劉子先  
朱行中同作試官

應詔造庭奏篇入等一時遴遴多士榮觀竊以漢唐設  
科蓋以待非常之俊劉董論事亦足見有為之才國家  
累聖相承得人甚盛半為當世之公相或出同門之父  
兄自非學洞天人識貫今古發憤吐懣不懼嬰鱗之危

投溢扶哀深知鼓瑟之變則何以禮隆仄席望重縉紳  
抗足而脫塵埃矯首而登雲漢恭惟某官明燭萬里富  
兼九流不為章句之腐儒竊鄙簿書之俗吏以天下而  
自任為衆人之不能謹論激揚壓以萬鈞而彌壯多聞  
霽霽窘之一日以如流理物有藥石之良利民如布帛  
之煖通達國體疑素宦於朝動寤上心恨相見之晚較  
然明白略已施行願論說之有源將陶鎔之在手某素  
惟寡學猥預持衡觀水於濶詎躬渤澥按圖求駿偶識



驂騑惠然投我以夜光何有報君之玉案載懷謙抑益  
用閔藏得之若驚常欲置之懷袖永以為好猶將示諸  
子孫感戴之私誦言罔究

上執政求外任

時見任秘閣校理

挾無知而避世動則多違犯不韙以望人困而寡與蓋  
勢疎者情隔能薄者力微信未感於言前志欲行乎畧  
外徑庭直往猶如寸梗之撞鍾咄囁自營僅若飛蚊之  
過耳知難而退乃分之宜其或心以願違勢由私迫須

吏之渴未能穿九仞之泉跬步所休何暇種十年之木  
謂不才而無取宜廢於人見有力者必鳴或關諸命伏  
念某蚤從鄉校入踐書林學未達先生之言名不掛通  
人之論耗精神於蹇淺困年力之類侵是非不謬於自  
知利害相摩於多故同堂并冠嫁娶並舉者十人舊里  
田園黍稷不供者數歲加以伯兄長謝先壠未歸累然  
諸孤殆絕生意獨有少弟僻在海隅矻矻以窮年嘗耿  
耿而不寐嚴助懷故土之樂罷直承明陶潛求三徑之

資願為彭澤而況手足寡急難之助閨門多凍餒之憂  
期一假於外官願何辭於俗更有政事之責可以赴功  
蒙祿廩之優足以收族恭惟某官大猷經世一德亮天  
利萬物以無私恥一夫之失所退惟頑陋夙被珽鎔冒  
歲月以淹回乏毛米之稱報因人並奏既同南郭之吹  
竽以病得賙獨幸支離之受粟言斯甚迫理或可矜竊  
以廉者之無求樂聞君子之虛受願屠門之割大嚼何  
為寄鷓鴣之棲一枝良足

回謝馬狀元

奏藝明庭策名上第喧前騶於廣路觀者肩摩落餘藁  
於四方傳之紙貴望高時俊光動儒林乃太平養士之  
功亦諸生稽古之報某人天姿俊徹學術粹深壁水升  
堂七年並席金鸞唱籍一鳴驚人蓋志大者氣全故實  
脩而名望落落高騫於日下錚錚獨黯於彀中御史直  
聲固遺風之自許平津相業不數歲而可期某夙仰英  
游阻聞緒論方欲效李邕之識面慕盧仝之卜交奉詔

殿廬幸觀落筆曳裾公府復枉過門惠然投我以夜光  
何有報君之玉案通衢在望絕足方邁陽春白雪之音  
一時寡和金馬玉堂之步指日可期某猥預盛時喜聞  
榮捷雖仰洛中之價未盡麈尾之談

賀吳正言

右某伏審光膺宸綽更踐諫垣聞命之初望風而躍竊  
以蕙蘭擢秀久幽而不改其芳鳳凰來翔一出則大驚  
於世而況君子獨安其處衆人皆謂之賢揚於明庭宜

在高位乃生靈之盛福寔上下之相驩嘗聞士必貴於  
有為志先行其所學一失是非之辨終迷聲利之場言  
欲出而畏憂氣益卑而沮喪發憤吐懣彼獨何人持祿  
養交寢成習俗惟大人之特立秉常德而不移於義也  
剛不可則止衆人紛警懷著龜先見之明末路淹回挺  
松栢後凋之操屬明王之嗣服筵萬事以圖新數求多  
聞丕式元老方虛心於占訓俄仄席於讜言毅然容貌  
之堂堂是謂王臣之蹇蹇風節可畏足以厭難於未形

議論敢前足以致君於無過此寔德名之選大為邦國  
之光施膏澤以下民稍安輿論贊大鈞而播物行竣我  
公某猥以微蹤夙叨優眷限拘官守阻造台庭

賀吳鹽運轉官

伏審祇承寵渥峻陟華資叙舜庭考績之優詔商典懋  
官之舊邇聞成命增激懽悰恭惟某官器宇靜深智猷  
通博遇事有不疑之決在公惟匪懈之憂百吏承風凜  
若神明之畏九年足食出於指顧之餘天子重稱其才

朝廷無出其右果膺殊眷特拜茂恩竦簪紱之榮觀契  
明良之嘉會使軒留愛已夙慮於公歸廟鼎元勲將默  
符於帝賚即聞迅召入覲嚴宸某素託恩休阻趨威重

賀李資深中丞

光被渙恩峻陞中憲外刺百官之失內繩庶事之違大  
臣畏法而修天子歛容以遇方朝廷責成之際乃事功  
考實之時必得剛明肅乂之士以正其紀綱庶幾上下  
遠近之情不欺於視聽果聞輿論僉屬我公傳命之初



有識相慶某官高標華國清德照人志包九萬之圖氣  
拔東南之秀始德稱於公相俄名暴於京師接武俊林  
飛緜禁掖高牆可仰士尤喜於先登大筆如神上亦嗟  
其晚見忽厭承明之直暫分瀕海之封馬周方重於太  
宗賈誼復來於宣室爰裨袞闕遽掌綸言坦明追二帝  
之書深厚過兩京之制紫垣洒墨湧妙思於泉流白簡  
數姦勵孤風而鶚立禮法修而百度正議論一而庶心  
傾即正鈞衡大施德業不獨重風霜之任亦將隆柱石

之功其夙荷眷存久稽參侍搶榆之跡徒仰於搏霄賀  
厦之心尚拘於鼓翼

賀李邦直舍人

寵膺帝制光贊綸言潤色聖人之辭道宣王者之志此  
多士文章之選為一時儒學之榮才之所難得者蓋寡  
翁聞嘉命歡動衆心某官思識靖深器能起拔文足以  
經天而緯地道足以致君而澤民望高華岳之五千氣  
吞雲夢之八九竭從魏國來對漢庭咳談坐斥於淵雲

器業遠躋於晁董飛名京邑竊卑稷下之游洒筆中堂  
共駭洛陽之少言不激於高訐理獨盡於忠嘉深簡上  
心首登清選崢嶸金馬之譽咫尺玉堂之遊暫領憲於  
東州復懷鉞於左史重資才藻兼代訓辭人爭嘆於湧  
泉更每虞於脫腕兩漢之制雖尚覩於遺風三代之文  
可復還於今日即聞大拜行奮遠圖某夙眷存久稽  
叅侍下情無任傾依之至

賀范龍圖移慶州

光膺嘉命更鎮雄藩愛養利源適秉輶於東部統制方面遽握節於西州在君子之時升宜天下之同慶況居屬郡良切懽悰願惟安化之河開寔據昆夷之衿背苟知其策則矢石不試一失其御則疆場屢驚必資忠智之臣以副朝廷之眷某官家聲著代世德在民卓有高明之才夙懷康濟之志輟從禁掖暫守帥垣人蒙奠枕之安國賴長城之固避子亭之坐可想遺風立棠棣之碑何慙往躅竚還閭寄入贊冢司某限守州符阻趨鈞

屏下情無任傾頌激切之至

賀胡學士加職知桂府

竊以海中三峯地稱仙境嶠南五筦天限炎荒一則提  
封屏翰之邦一則取象圖書之府惟時嘉命屬我名臣  
恭惟知府安撫龍圖問學淵微器能通博奉咨詢之煩  
使美譽處於先朝入綴星郎暫游蘭省後來居上安暇  
競時獨秀必摧翻成選物寧遇風而知退恥躍金以自  
言疾驅太行周覽二陝邊民待哺喜車馭之復來野老

饋漿驚節麾之幾盡果膺優詔擢預清班能世其家清  
羶故在不難為弟棠棣相承願東眷之方隆將陶鎔之  
在即折衝萬里雖賴得人雅意本朝未容去國行聞美  
拜寔慰僉言某素以孱愚重叨獎遇為屬部之吏嘗脩  
下陳同舉酒之歡復陪廣座猥煩謙德先辱長緘得之  
若驚嘗欲置之懷袖永以為好將猶示諸子孫感荷之  
深誦言奚既

上李邦直

一違釣坐再閱歲華久摠俗吏之簿書幾廢小夫之竿牘盈尺之紙安能自寫其肺腸萬頃之波固亦不遺於汙潦憂皇所載展轉益危與其自棄而不言孰若以誠而歸罪某官生民先覺盛世元臣吐辭為經鄙荀揚之未粹以道致主非堯舜而不陳經綸以四海為心進退有古人之節前功未就毅然待旦而行庶政已成率爾乞身而去暨資舊德作鎮別都時驅大府之旌牙坐嘯昔遊之泉石腹心之託曾未間於須臾天日之光常不

違於咫尺精神相感寤寐不忘宜一德之有求乘三陽  
而並進為天下計必資良佐之才以我公歸永作生民  
之福某素慙譎陋曲被陶成每殫十駕之勤愧乏一毫  
之補輒鮒得水雖切幸於餘波塞馬嘶風終不忘於故  
國限拘官守阻造賓庭

樂靜集卷十六